



WPK

Број: 30.09.2019.

Sarajevo, 01,02,03,03/11-05-1-386/19

PRIMLJENO: 04-11-2019			
Organizaciona jedinica	Klasifikaciona oznaka	Redni broj	Broj priloga

Izvjestaj

sa 4. sastanka predsjednika parlamenata euroazijskih zemalja,  
Nur-Sultan, Republika Kazahstan,  
23. i 24. septembar 2019.

Parlamentarnu skupštinu BiH je na 4. sastanku predsjednika parlamenata euroazijskih zemalja u Nur-Sultanu, Republika Kazahstan, 23. i 24. septembra 2019, a na poziv predsjedavajućeg Donjeg doma Parlamenta Republike Kazahstan Nurlana Nigmatulina, predstavljao je predsjedavajući Doma naroda Parlamentarne skupštine BiH Bakir Izetbegović.

U svom obraćanju o temi „Veća Euroazija: dijalog, povjerenje, partnerstvo“ predsjedavajući Izetbegović učesnike konferencije upoznao je s napretkom koji je Bosna i Hercegovina ostvarila u oblasti ekonomskog razvoja i na putu integracija u Evropsku uniju, kao i s mogućnostima saradnje koje Bosna i Hercegovina nudi.

Izetbegović je u uvodu obraćanja podsjetio na to da je prije dvije godine kao član Predsjedništva BiH imao priliku posjetiti Kazahstan te da je bio oduševljen njegovom ljepotom i gostoprimstvom njegovih ljudi.

- Naši prijateljski odnosi počeli su se razvijati već od davne 1992. godine, kada je Kazahstan među prvim zemljama svijeta priznao BiH – kazao je Izetbegović.

Predsjedavajući Doma naroda istaknuo je da susreti poput ovog u Nur-Sultanu imaju poseban značaj jer su, ocijenio je, dobra platforma i mogućnost da se razmijene informacije i stvori neophodno povjerenje koje treba rezultirati partnerstvom, a sve to na koncu u korist i za dobrobit građana koji žive u našim zemljama.

- Ovo nije tek puka teza, jer moja zemlja BiH koju ovdje kao predsjedavajući Doma naroda Parlamentarne skupštine predstavljam ima bogato višestoljetno iskustvo dijaloga i stvaranja povjerenja među različitim etničkim i religijskim skupinama – poručio je Izetbegović.

Napomenuo je da je BiH demokratska zemlja koju zbog njene kulturološke i religijske isprepletenosti, te geografskog položaja i historijskog naslijeđa, opravdano smatraju mostom između Istoka i Zapada.

- Njen glavni grad Sarajevo, u kojem u neposrednoj udaljenosti od nekoliko stotina metara možete vidjeti i moliti se i u pravoslavnoj i u katoličkoj crkvi, u sinagogi i u džamiji, nazivaju „Jerusalemom Evrope“. To je zemlja sa izuzetno obrazovanim ljudima i radnom snagom, značajnim prirodnim resursima i mogućnostima za ulaganje u energetska, metalna, prehrambena i namjensku industriju. Sa svojim geografskim položajem u blizini tržišta EU, a kao potencijalni kandidat za članstvo u EU, BiH pruža odlične mogućnosti za razvoj ekonomske saradnje – izjavio je Izetbegović.

Izetbegović je istakao da je BiH u proteklom periodu, a posebno u posljednje četiri godine, ostvarila napredak u mnogim oblastima.

- Reformska agenda koja je usvojena u julu 2015. ostvarila je imponantne rezultate. Usvojeni zakonski i podzakonski akti omogućili su najznačajniji ekonomski rast i razvoj u postdejtonskom periodu. Industrijska proizvodnja rasla je preko 4% godišnje, prerađivačka industrija preko 6%. Izvoz je rastao dvocifrenim procentima, u četiri godine ukupno 39 %, najbrže je rastao turizam, skoro se udvostručio u četiri godine. Nominalni BDP je rastao prosječno 3% godišnje. Broj zaposlenih porastao je za 14 % u protekle četiri godine – podsjetio je predsjedavajući Doma naroda.

U tom kontekstu izdvojio je i obim vanjskotrgovinske razmjene, koji je prešao 30 milijardi KM, te velike pomake u trgovini koji su ostvareni posljednjih godina u trgovini s Republikom Turskom.

- Očekujemo da će obim razmjene najvjerojatnije u ovoj godini dostići ciljanih milijardu dolara. S Ruskom Federacijom također bilježimo znatne pomake, posebno u izvozu hrane na rusko tržište. Ono što posebno ide u prilog napretku na ekonomskom planu jeste i činjenica da se oko 70% naših proizvoda izvozi u EU, s kojom imamo veoma povoljne bescarinske aranžmane. Saradnja firmi iz euroazijskih zemalja s bh. firmama kroz Joint-Venture projekte pruža i njima iste pogodnosti – kazao je Izetbegović.

- Stupio je na snagu Sporazum o stabilizaciji i pridruživanju s EU i predali smo aplikaciju za članstvo u EU. Nakon uspješno odgovorenog seta od skoro 4.000 pitanja, dobili smo Mišljenje Evropske komisije koje sadrži niz preporuka čije ispunjenje nam daje realnu šansu da uskoro dobijemo status kandidata za članstvo u EU. Dakle, pravi je čas za intenziviranje saradnje i investiranje u BiH – podsjetio je Izetbegović.

Napomenuo je da se obostrano korisna saradnja može ostvariti samo razgovorom, međusobnim uvažavanjem i osiguravanjem političke stabilnosti uz maksimalno poštivanje principa pravne države i vladavine zakona.

- Na nama kao parlamentarcima i političkim predstavnicima naših naroda i zemalja leži odgovornost da u svojim zemljama osiguramo prosperitet i napredak za sve naše građane, a onda i da se međusobno zalažemo za iste ciljeve na globalnoj agendi – poručio je predsjedavajući Doma naroda.

Tako će, dodaje, biti lakše realizirati Program održivog razvoja 2030 sa 17 Globalnih ciljeva usvojenih na Samitu UN-a 2015. godine, što je nesumnjivo jedan od zajedničkih prioriteta.

- U tom smislu važno je podsjetiti na to da prostor Euroazije pokriva oko 65% svjetskog stanovništva, 75% izvora energije i 40 % svjetskog GDP-a, te bi dalje unapređenje posebno ekonomske saradnje imalo pozitivne efekte kako za naše pojedinačne zemlje, tako i na čitav euroazijski prostor. Samo uz pojačanu međusobnu interakciju možemo bolje razumjeti jedni druge, uskladiti naše zajedničke ciljeve i izgraditi korisne međuparlamentarne veze i partnerstva. Izgraditi Veliku Euroaziju. Neka ovaj forum na koji se odazvalo više od 50 zemalja i 16 međunarodnih i međuparlamentarnih organizacija bude dokaz da to i želimo i možemo – zaključio je Izetbegović.

Tokom sastanka Bakir Izetbegović dao je zajednički intervju za novinske agencije Fena i Kazinform u kojem je, između ostalog, iznio i svoje impresije o Kazahstanu i prijestolnici ove srednjoazijske države – Nur-Sultanu.

Upitan o mogućnostima saradnje između ove dvije zemlje, Kazahstana i BiH, Izetbegović je kazao da postoji dosta prostora za proširenje saradnje.

*"Smatram da će ljudi iz Kazahstana i ljudi iz BiH naći načina da to ostvare, jer vidim dosta sličnosti u mentalitetu i duhu naroda Kazahstana s narodom u BiH. Postoje neke povijesne poveznice. Osmanski Turci donijeli su elemente vaše kulture kod nas. Općenito, mi smo narod koji je spreman boriti za slobodu i bolju budućnost. Postoje neke sličnosti između ova dva naroda. Tako da će oba naroda sigurno iskazati želju za saradnjom. A, naravno, tu imamo u vidu i interes. Nursultan postaje središte događanja u ovom dijelom svijeta. BiH će to iskoristiti. Istovremeno, Sarajevo, Bosna i Hercegovina mogu postati takvo središte za Kazahstan, jer je sve u Evropi blizu Sarajevu. Svaka prijestolnica je udaljena sat vremena leta od Sarajeva, Istanbul nam je također blizu. Tako da vi imate mogućnost da ulažete u Evropu preko Bosne i Hercegovine. Mi imamo dobre sporazume s Evropskom unijom, bez poreza i carina. Možete prodavati svoje proizvode ako imate zajedničke poduzetničke projekte s kompanijom u BiH", poručio je Izetbegović.*

Također, tokom boravka u Nur-Sultanu, u okviru kulturnog dijela programa, otvorena je izložba fotografija osnivača SDA i prvog predsjednika Republike BiH Alije Izetbegovića na kojoj se Bakir Izetbegović obratio prisutnima, kazavši da vjeruje da to rahmetli Alija Izetbegović zaslužuje, budući i da spada u grupu odabranih i hrabrih ljudi koji su dali velike lične žrtve u borbi za slobodu i principe na kojima počiva civilizirani svijet.

Izetbegović je kazao da je Sarajevo nazvano "malim Jerusalemom", jer se u njegovoj čaršiji bukvalno oslanjaju jedna na drugu crkve, džamije, sinagoge.

Ta multietnička sredina odredila je i životnu filozofiju i put Alije Izetbegovića.

"Bosna nije samo parče zemlje na brdovitom Balkanu, ona je i ideja da različite vjere i kulture mogu živjeti zajedno. Alija Izetbegović stasavao je u vremenu dramatičnih društvenih promjena, poremećaja i propasti ustaljenih poredaka i odnosa, vremenu revolucija, agresivne ateizacije, bujanja fašizma i komunizma te, kako je kazao, ideologija bez Boga i protiv Boga. Agresivni ateizam, pokušaj da partija zamijeni Boga, nepoštivanje i relativiziranje svetosti istine, kolektivizam koji je potirao slobodu individue, za njega su bili neprihvatljivi. Kolebanje i preispitivanje vjere je, izgleda, bila veoma važna faza u formiranju budućeg islamskog mislioca i političkog lidera Alije Izetbegovića", kazao je, između ostalog, Bakir Izetbegović.

Četvrti sastanak predsjednika parlamenata euroazijskih zemalja na kojem su učestvovali predstavnici iz više od 50 zemalja svijeta i 16 međunarodnih i međuparlamentarnih organizacija pružio je priliku za nastavak dijaloga vodećih parlamentaraca iz država Evrope i Azije, koji su u protekle tri godine održani u Moskvi, Seulu i Antaliji.


Istovremeno, sastanak predsjednika parlamenata euroazijskih zemalja u Nur-Sultanu predstavljao je efikasnu platformu za nastavak razgovora o ključnim pitanjima saradnje, održivog razvoja i prosperiteta država Evrope i Azije.

U tom svjetlu, usvojena je i Deklaracija sa 4. sastanka predsjednika parlamenata euroazijskih zemalja.

Na 4. sastanku predsjednika parlamenata euroazijskih zemalja, osim predsjedavajućeg Doma naroda PSBiH Bakira Izetbegovića, prisustvovali su i: Elvis Kondžić, savjetnik-šef Kabineta predsjedavajućeg Doma naroda PSBiH, i Enida Mehmedovski iz Sektora za međunarodne odnose i protokol Sekretarijata Parlamentarne skupštine BiH.

Izveštaj pripremila:

Enida Mehmedovski




Izveštaj odobrio:

predsjedavajući

Doma naroda PSBiH

Bakir Izetbegović



Dostaviti:

- Kolegiju Predstavničkog doma PSBiH
- Kolegiju Doma naroda PSBiH
- Kolegiju Sekretarijata PSBiH
- Komisiji za vanjske poslove Predstavničkog doma PSBiH
- Komisiji za vanjske i trgovinsku politiku, carine, saobraćaj i komunikacije Doma naroda PSBiH
- Sektoru za odnose s javnošću Sekretarijata PSBiH
- Sektoru za međunarodne odnose i protokol Sekretarijata PSBiH

Kopija: Ministarstvo vanjskih poslova BiH